

Penghantaran 44 pelajar tajaan MAINS ke Mesir dilewatkan atau dibatal

# Opsyen belum dimuktamad - MB

Oleh AINOL AMRIZ ISMAIL

utusanN9@utusan.com.my

**SEREMBAN** 5 Sept. - Kerajaan negeri belum memutuskan nasib sebanyak 44 pelajar tajaan Majlis Agama Islam Negeri Sembilan (MAINS) yang sepatutnya sudah berada di negara Mesir untuk mengikuti kursus intensif Bahasa Arab serta memasuki universiti di negara berkenaan dalam bidang yang dipilih.

Menteri Besar, Datuk Seri Mohamad Hasan berkata, kerajaan negeri serta MAINS sedang memikirkan beberapa pilihan bagi membantu mereka dan buat masa ini kesemua pilihan itu belum dimuktamadkan.

"Pilihan pertama ialah menunggu sehingga krisis ini selesai dan keadaan selamat serta mendapat keizinan penghantaran semula pelajar daripada Kerajaan Pusat. Ini bermakna, kita lewatkan penghantaran mereka atas dasar keselamatan," katanya.

Mohamad ditemui pemberita selepas menyaksikan lafaz ikrar pelajar baharu Universiti Sains Islam Malaysia (USIM) di Nilai dekat sini hari ini yang turut dihadiri Naib Canselor USIM, Prof. Datuk Dr. Asma Ismail.

Beliau yang juga Pengerusi MAINS memberitahu, sekiranya krisis itu tiada kesudahan dan berisiko tinggi untuk menghantar pelajar ke negara bergolak itu berkemungkinan penghantaran pelajar kumpulan terbaharu tersebut akan dibatalkan.

"Namun, pilihan kedua ini tidak dimuktamadkan lagi. Berkemungkinan penghantaran pelajar ini kita alihkan ke negara lain seperti di Jordan atau pun menempatkan mereka ke universiti tempatan, seperti USIM, Universiti Kebangsaan Malaysia (UKM) dan Universiti Malaya (UM)," katanya.

Buat masa ini, ada universiti di Mesir masih lagi meneruskan pengajian dan akan melaksanakan

peperiksaan akhir tahun manakala sebahagiannya masih lagi ber-cuti.

Menurut Mohamad, sebanyak 12 daripada 44 penuntut tajaan MAINS itu merupakan penuntut bidang perubatan dan telah memilih melanjutkan pelajaran ke Mesir walaupun sebelum itu mendapat tawaran pengajian dalam negara.

"Perubahan lokasi pengajian mereka ini sama ada di negara lain, mahupun dalam negara ini akan diperbincangkan dengan pihak Kementerian Pendidikan serta Unit Pengambilan Universiti (UPU), begitu juga 32 penuntut lain yang mengikuti bidang pengajian Islam," ujarnya.

Dalam majlis tersebut, sebanyak 2,444 penuntut baharu melafazkan ikrar mereka di hadapan Mohamad, sekali gus menyaksikan USIM mencatatkan jumlah pelajar mendaftar sebanyak 92 peratus yang membuktikan universiti itu adalah pilihan utama.



**WAKIL** pelajar menyerahkan ikrar pelajar baharu Universiti Sains Islam Malaysia (USIM) kepada Mohamad Hasan dalam majlis lafaz ikrar pelajar baharu USIM di Nilai, Negeri Sembilan, semalam.